

白樂天文集卷之四

制

鎮州軍將王怡判官李序先被賊中誅囚並
死各贈官及優恤子孫制



勅朕嘗思鎮奠之間弔伐之際有仗順死義不吾聞
者因命弘正列狀以聞而某官王怡等頃陷艱虞思
伸忠効或名節將立併命於幽憂或義烈臨奮尖身
於戮辱履危如虎尾視死如鴻毛若無褒揚何勸天
下既降飭終之命仍加身後之禮追深延寵有越常

論與彼死節之魂忠憤之骨知我憐憫歿無限焉怡
可贈左僕射序可贈給事中

武寧軍陣亡大將軍李自明贈濠州刺史制
勅王師之討蔡平郟也自明為武寧裨將隸于元戎
凡所指蹤必先致命三軍之士于令稱之有勞未圖
無祿早代生不及賞歿而加恩庶使猛將義夫聞而
相勸曰死猶不忘况生者可贈濠州刺史

裴弘泰可太府少卿知左藏庫出納制

勅前度支河北推鹽使朝議郎檢校尚書刑部郎中

使持節貝州諸軍事兼權知貝州刺史侍郎史克本
州防禦使上柱國賜紫金魚袋裴弘泰九土之貢百
品之貨辨其名物謹其出納常在外府統以上卿宜
永幹敏之才以為之貳而弘泰頃分推務兼撫郡民
嘗軍興之時法行政立則受藏之庫事繁物殷量其
器能可以專委勉膺是任無替前勞可守太府少卿
知左藏庫出納散官勳賜如故

李昌元可兼御史大夫制

勅通議大夫使持節儀州諸軍事儀州刺史兼御史

中丞上柱國李昌元弓裘令子疆場勞臣能讀父書
甚識戎事每在陣戰未嘗無功及委藩條亦聞有政
而知臣者君也賞勞者爵也亞相之秩威重寵榮加
乎爾身以勸能者可兼御史大夫餘如故

田頴可亳州刺史制

勅正議大夫前檢校右散騎常侍兼持節涇州諸軍
事兼涇州刺史御史大夫充本州團練使上柱國賜
紫金魚袋田頴自列屯將壘專領郡城而能勤恤師
人與之勞逸故臨戎則士樂為用撫下而衆知響方

忠勲既彰純政亦著牧守之選吾所重之譙鄴之間
人亦勞止授爾印綬往勞衆之宜推前心佇立後効
可檢校左散騎常侍使持節亳州諸軍事兼亳州刺
史御史中丞本州團練使鎮遏使散官勲贈如故

薛伯高等亡母追贈郡夫人制

勅某夫人某氏等始播婦儀終垂母道教其令子為
我良臣而皆茂著才名榮居爵位永言聖善宜及顯
揚俾追啓邑之封式表紱家之訓可依前件

李佑授晉州刺史制

勅牧守之官與吾共理下之安否繫乎其人必稽前
功方降是命某官李佑夙負才器累經任用當領軍
郡頗著政聲而平陽舊都迭罷征鎮土疆事物既廣
且繁藉爾良能為予撫字夫均其征役簡其科禁謹
身省事以臨其人而人不安未之有也徃弘是道以
康晉人可依前件

武寧軍將王昌涉等授官制

勅王昌涉等早以才力召募後軍元和以來南征北
伐咸有勞績著于一時主帥上聞乞加褒賞故以寺

卿憲職序而寵之無棄前功在申後効可依前件

馬總亡祖母韋氏贈夫人制

勅某官馬總亡祖母韋氏播茲懿範貽厥嘉謀施及
孝孫寶居貴仕將明餘慶其在追榮不惟垂裕後昆
抑亦光昭幽壤宜降封丘之命以慰令伯之心可贈
某夫人

路貫等授桂州判官制

勅藩隅之重委以侯伯軍府之要掌在賓寮貫等以
文行脩身以智謀從事佐廉簡澄清之務撫華夷錯

雜之人得其久安實在參贊宜及寵命以光所從可依前件

駙馬都尉鄭河除右衛將軍制

勅周設七萃漢列八屯皆以措衛王官肅嚴微道統茲騎吏其屬親賢其官鄭河擢秀士林挺質公器以貞和陶其性以禮樂文其身善積德門慶連戚里况以踐名職累著聲猷念舊獎能宜加榮寵環列之尹不易其人俾宣力於爪牙不失親於肺腑可右衛將軍餘如故

封太和長公主制

勅公主之封號也或以善地或以嘉名立愛展親茲惟舊典第四女端明成性和順稟教靜無違禮故組以有常訓勳必中節故環珮有常聲歲歲徽徽之日新淑問乃著肅雍之德俾開湯沐之封可封長公主

宋朝榮加常侍制

初河東普度都押衙試太子賓客兼御史中丞承朝榮有戰功擢領邊郡揆能適用故有轉遷茲按上察牙門右職雖有兼命未表殊恩宜加駙省之榮不

改憲臺之重以茲寵任足報忠勲爾其敬承無隳乃
功可檢校左散騎常侍餘如故

贈陣亡軍將等刺史制

勅故某官某等王師問罪至于淄青爾等同執干戈
親當矢石忠而盡瘁勇以忘身或退卒于師或進歿
于戰俱死王事深惻朕念以捐軀於軍前宜追命於
泉下郡守之貴以示褒崇可依前件

諸道軍將等授官制

勅平齊之後也諸軍指期衆校合戰某官等各輸戮

勇同樹勲勤永思積日之勞頗愧踰時之賞故於獎
授有所超遷朝省貴班官坊清秩或參憲職分以命
之庶知我心不忘忠力可依前件

裴度韓弘等各賜子官并授姪女壻等制

勅某官某等謁廟郊天改元賜青是為大慶與衆共
之矧股肱心膂之臣與吾同體延賞任子其可廢乎
爾等或以文華或以吏職有所備立稟於義方自當
褒升况霑慶澤俾舉展親之典用叶推恩之道猶子
愛壻各命以官爾其敬承無忝朝獎可依前件

入迴紇使下軍將官吏夏侯仕戡等四十人
授卿監賓客諮議衛佐同制

勅某官夏侯仕戡等前命鄭權之入迴紇也尔等參
護使軍用祇王命悉心盡力有恪恭跋涉之勤焉宜
以省寺軍衛之班官坊府邸之列舉為賞與分以寵
之辯等旌勞於是乎在可依前件

盧昂可監察御史裏行知轉運永豐院制王
番奏請

勅號州司戶叅軍盧昂前負瑕疢事多曠昧今聞脩

省善亦昭彰况有大僚同知情狀且明非罪仍舉有
才吾信人言遂可其奏尔思自効無辱所知可依前
件

張惟素亡祖紘贈戶部郎中制

勅右散騎常侍亡祖某縣令某德合上玄才終下位
命屈於當代慶流於後昆故其孝孫實登貴仕經曰
無忝爾祖詩曰貽厥孫謀此言孫之謀能顯揚其先
祖之德能垂裕于後也不追榮於列宿曷旌德於太
丘可贈戶部郎中

興州刺史鄭公達授王府長史李膺授興州
刺史同制

勅鄭公達等或以行稱或以才舉進脩所致班秩不
卑改命序遷各適其用且乘朱輪於郡邸曳長裾於
王門士子名官至斯亦不為不遇也立朝案部各敬
尔官可依前件

權知陵州刺史李正卿正除刺史制

勅審材之要考察為先吾之於人試可乃用李正卿
願聞吏道因假郡符畏法愛人善於其職夫速旌其

能則吏勸必於其政則化成未可轉遷就加真秩副
吾知獎無怠始終可陵州刺史

知渭橋院官蘇洵掾員外郎依前職前進士

王績授校書郎江西巡官制

勅某官蘇洵嘗以幹良分領劇務受任稱職主者上
聞績既有成賞安可闕前進士王績亦以藝學籍名
太常著其令聞及此慰薦一以課進一以才升咸加
班榮同以褒獎臺官校職尔各欽承可依前件

湖南都押衙監察御史王瓘可郴州司馬依

舊職制

勅某官王璿郡司馬之官秩祿頗厚凡在戎行有軍課者多兼命以優寵焉而璿以鞭弭橐鞬從事征鎮前後主師咸無有功宜加新命仍率舊職蓋欲懲往勞而責來効也尔其勉之可兼郴州司馬

安南告捷軍將黃士傑授銀青光祿大夫試

殿中監制

勅某官黃士傑戎首來降陪臣告捷服勤靡盬將命無違宜以恩崇獎其勞効貴階崇秩兼而寵之可依

前件

王鎰可刑部員外郎制

勅刑曹郎秩朕詔執事擇可以善於其職者而殿中侍御史王鎰自居殿中能察非法遠鞠庶獄多叶平允加以溫敏靜專可當是選一歲之獄決在秋冬令方其時宜敬乃職

京兆府司錄叅軍孫簡可檢校禮部員外郎
荆南鄧度判官浙東判官試大理寺評事韓
似可殿中侍御史巡官試正字晁朴可試協

律卽充推官同制

勅某官孫簡等凡使府之制量職之輕重以命官揆時之遠近以進秩俾等第有常序遷次有常程勞逸均而名分定矣簡自登憲司佐相幕府暨糾天府皆有可稱而似等亦以文學發身謀畫効用荆揚浙右實籍寶寮况今之公卿大夫皆由此途出慎爾職事爾無自輕可依前件

興州奏事官田練可興州司馬兼殿中侍御

史制

勅某官田練幹敏立身公勤濟事奉州將之手疏達軍人之血誠念其忠勞宜有寵擢假憲名於殿內遷郡秩於治中茲謂兼榮尔其敬受可依前件

歸常翹可刑州刺史本州團練使制

勅新授深州刺史歸常翹平蔡之役常領偏師實立勲勞遂膺寵任今屬方隅多故將守用能且以翹之長材居刑之要地故命魚符換郡熊軾移轍夫事至而功成時來而節見此忠良之事業也尔其念之哉可依前件

牛元翼可檢校左散騎常侍深州刺史御史

大夫制

勅某官兼御史中丞權知深州事牛元翼命官之要
凡試吏者必俟成效然後即真而元翼有理戎之才
扞城之畧權領軍郡能脩武經士樂人安厥有成績
是用假威臺憲真拜郡符仍以金貂示其兼寵吾聞
忠臣立節烈士垂名其要無他得時而已勉竭材力
副予斯言可依前件

王衆仲可衡州刺史制

勅前虔州刺史王衆仲聚學修身由文飭吏累經任
使頗著良能前牧南康亦聞有政宜新印綬載頒藩
條而衡湘之間蠻越雜處無以俗陋不慎乃事無以
地遠而怠厥心副吾陟明俟汝奏課可依前件

田盛可金吾將軍制

勅右金吾衛將軍田盛夫仕官至執金吾古今所榮
重也而盛生勲德門有文武畧居貴介而無失領軍
戎而有勞言念激巡之功宜及轉遷之命處左攝事
以表使能可依前件

陳楚男王府諮議叅軍君賞可定州長史兼
御史軍中駢使制

勅某官陳君賞夙承義訓幼有令聞專繼弓裘之名
通知軍旅之事因仍憲職兼佐郡符敬服寵章勉從
任使

崔承寵可集州刺史制

勅太子左諭德崔承寵早登班級亟換星霜自陳力
於貴朝屢奉辭於外國職因事博績以勞成就列官
方既申贊諭之美分符郡邸佇聞刺舉之能宜勵公

心祗承寵命

前貝州刺史崔鴻可重授貝州刺史制

勅前貝州刺史崔鴻嘗牧貝丘能脩其職及辭印綬
頗有去思相時之宜任人之望俾換新命再臨舊邦
况聞蓄貯時材諳詳物務而方州思理侯伯薦能勉
勤為政之先勿忝知人之舉

前吉州刺史李繁可依前吉州刺史制

勅前吉州刺史李繁累奉藩條皆奏課第故移縉雲
之政俾牧廬陵之人雖降璽書未臨郡邸屬魚章改

造能軼追還事既謀新職宜仍舊勦率分憂之任庶
成來暮之謠

瀛漢州都虞候萬重皓可坊州司馬制

勅某官萬重皓嘗資武力早備戎行頗歷艱虞六聞
勤効而藩隅未靖遷轉從宜言念前勞宜加優秩可
坊州司馬

崔墉可河南府法曹參軍制

勅鄆曹觀察判官監察御史兼行崔墉文行飭躬公
清奉職士林推美藩府爲師軍旅之間久資其用忠

勤之後不殞其名宜拔才於功臣俾試吏於府掾可
依前件

前河陽節度使魏義通授右龍武軍統軍前
泗州刺史李進賢授右驍衛將軍並檢校常
侍兼御史大夫制

勅夫文武之臣內外迭用軍國之任出入遍遷斯所
以優勳賢而均勞逸也某官魏義通以戎功積久榮
委旌旄某官李進賢以軍課居多寵分符竹各勤其
職咸用所長是以河陽三城鎮靜而不擾泗濱一郡

緝理而有勞我有禁軍尔宜分領親信則倚為心膂
動用則張為爪牙苟非其人不可付此任咸假貂蟬之
貴仍兼憲職之榮勉哉二臣無替一志可依前件

李玄成等授官制

勅黔州觀察使與度支使言玄成等或蘊畜能才容
謀是藉或分領劇務課績有成並可奏書各遷憲職
勉勤乃事無忝所知可依前件

馬摠准制追贈亡父請迴贈亡祖制

勅夫積善者慶鍾于後顯揚者光昭于先而摠貴為

邦君賢為國士荷貽謀之訓用率義之文上獻表章
有所陳乞朕念其祖德褒以臺卽所以復陳寔必興
之言慰范喬泣涕之恩庶使幽顯兩無恨焉可贈某
官

權知朔州刺史樂璘正授兼御史中丞制

勅樂璘專習武經旁通吏道試補郡守以觀其能連
帥上聞果副所舉夫審官之要在因其所長而任之
則政速成而化易就也才既試可官宜即真何以寵
之就加憲職可朔州刺史兼御史中丞

神策軍推官田鑄加官制

勅田鑄官列環衛職叅禁軍慎檢有聞恭勤無怠顧是勞効例當轉遷郡佐官寮以示兼寵

裴敞授昭義軍判官裴侔授義成軍判官各

轉官制

勅裴敞等昭義義成今之重鎮實籍貴介以叅謀猷而二帥皆勤於奉公精於辟士度才而授職循序而請官願合所宜咸可其奏可依前件

雲州刺史高崇朝除太子賓客河東都押衙

制

勅高崇朝常領銳師人攻堅寇因累獎賞位至專職才有所長宜遷戎職功不可忘兼進榮班勉事元戎無替勞効

韋綬等賜爵制

勅韋綬等去年春夏同奉寢園事集禮成副吾哀敬宜加封爵以報恪勤可依前件

烏重明等贈官制

勅故某官烏重明等夫生樹功勤及加褒飭有國之

常典也重明等在興元初常執勤于奉天策勳為定
難無祿即代有勞未圖星歲屢遷光塵不昧聞鞞之
念予心曷忘但慰幽泉各追顯秩可依前件

羽林龍武等軍將士各加改轉制

勅夫軍衛禁則內外嚴爵賞明則忠勤勸爾等咸以
材力列于禁營屬去年已來屢陳儀仗雖加賜與未
荅勤勞因詔有司舉行賞典吾匪虛矣爾宜敬承文
武班資各從序進可依前件

新羅賀正使金良忠授官歸國制

勅新羅使倉部郎中金良忠等朕以文明御時以仁
信柔遠聲教所及駭奔而來况溟漲一隅舟航萬里
爾慕我化我圖爾勞隨其等倫命以寵秩無替前効
永為外臣可依前件

韓公武授左驍衛上將軍制

勅朝散大夫檢校左散騎常侍兼右金吾衛將軍御
史大夫上柱國賜紫金魚袋韓公武我元老之令子
也孝於家忠於國故出則秉旄鉞人為執金吾寵任
益崇謙敬彌著而勤於夙夜疾疢所侵上陳表章乞

就煩養夫環衛之烈心膺之臣雖親信之寄則同而勞逸之間或異宜輟繁重俾從便安可檢校左散騎常侍兼左驍衛上將軍御史大夫散官勳如故

姚元康等授官充雜官掌書記制

勅朝散郎行秘書省秘書郎姚元康儒林郎試太常寺協律郎鄭懿等益部浮陽皆大征鎮也文昌全畧皆賢將相也而能以禮聘士以職任才多聞得人咸樂為用况爾等籌謀文藻各負所長苟能贊察兼掌奏記孜孜不怠翩翩有聲慰薦優異其則不遠元康

可試左武衛倉曹參軍充劔南西川觀察推官散官如故懿可試左金吾衛兵曹參軍充橫海軍節度掌書記散官如故

楊玄諒等三十人加官制

勅右神策軍忻州行營兵馬使試太常卿楊玄諒等夫才不錄則勸善之道廢勤不賞則念功之禮缺而玄諒等凡三十人咸列禁戎遂從征討臨難有身先之勇奔命無退避之勞宜以祿秩膺其忠効所謂材不失選賞不踰時占欲使為善者不疑有功者咸勸

也可依前件

白樂天文集卷之四

白樂天文集卷之五

制

除裴均中書侍郎同平章事制

門下朕聞后德惟臣良臣惟聖在太宗時實有房杜
贊貞觀之業在玄宗時實有姚宋輔開元之化咸克
佑我烈祖格于皇天朕祗奉丕圖懋茲洪業思以熙
百度和萬邦建中于人垂拱而理永惟房宋之化寤
寐求思至誠感通上帝眷佑采賚良弼輔予一人正
議大夫行尚書戶部侍郎上柱國賜紫金魚袋裴均

器得天爵文為國華行有根源詞無枝葉忠敬恭順
貫之以誠心方潔貞廉輔之以通識玉立不倚金扣
有聲洎內掌綸言密叅樞務嚴重有大臣之體溫雅
秉君子之文每獻納之時動有直氣常顧訪之際言
無隱情遠圖是經大事能斷廷予不違時乃之功及
領他官且司邦賦會計務劇出納事殷收利刃而皆
虛委琴絲而必理歷試已久全才益彰宜登中樞以
副僉望夫宰輔者下執邦柄上代天工為國著龜注
人耳目爾尚降乃德以親百姓廣乃志以序九流匡

朕心以清化源從人欲以致和氣予欲宣力汝為股
肱予欲詢謀汝為心膂予違望于汝弼勿謂不從汝
言遜于朕心必求諸道獨立勿懼直躬而行明聽斯
言敬踐乃位嗚呼罔俾房宋專美于前可中書侍郎
同中書門下平章事散官勲賜如故主者施行

除改祐檢校兵部尚書兼太子賓客制

門下為君之心惟功勞是念有國之典以賞勳為先
其有輯睦師徒保綏黎庶盡勤王之節建護塞之勲
則宜進以官常委之軍要兼文武之秩叅內外之勞

斯所以彰念功而明懋賞也四鎮北庭行軍兼經原
等州節度支度營田觀察處置等使光祿大夫檢校
工部尚書使持節涇州諸軍事涇州刺史兼御史大
夫上柱國鳳門郡開國公段祐早膺事任累著公忠
名因義聞位以勤致自分戎閫實控塞門明舉武經
大脩邊備士卒有勇保障無虞虜不近邊農皆狎野
屐執珪之勤禮瀝戀闕之深誠方圖爾勞且遂其志
夫六官充職大司馬列于前二廣分師上將軍處其
右長夏官以率屬領環衛而拱宸苟非信臣安可兼

委嘉乃實効副予虛求將慎重其腹心宜進登於喉
舌敬服休命勉揚令圖可檢校兵部尚書右神策軍
步軍大將軍知軍事散官勳封如故主者施行

除趙昌檢校吏部尚書兼太子賓客制

門下二者以尚齒尊賢為體以念功任舊為心况文
武之才有以兼備則中外之職所宜迭居所以寵為
勳而優耆德者也前荆南節度管內支度營田觀察
處置等使金紫光祿大夫檢校兵部尚書兼江陵尹
上柱國天水郡開國公趙昌聚學飭身脩誠致用久

膺事任累著勲猷統護交州威惠之聲克振鎮臨南海撫循之政有經自移部荆門馳心魏闕增備職貢益勵忠勤爰舉寵章用旌茂績夫望優四皓然後能調護春闈才冠六卿然後能紀綱外府惟爾年德足尚可以周旋其間宜增喉舌之榮以崇羽翼之任服我休命其惟懋哉可檢校吏部尚書兼太子賓客散官勲封如故王者施行

除鄭綱太子賓客制

門下王者重輔弼之任明進退之宜見可即升知否

則捨茲朕所以推誠不惑與物無私者也銀青光祿大夫守門下侍郎同中書門下平章事兼弘文館大學士上柱國陽武縣開國侯鄭綱早以令聞入叅禁署永惟勤績出授台司期爾有終匡予不逮歲月滋以謀猷寢微罔清靜以慎身每因循而保位既乖素履且鬱皇猷宜副羣情罷茲樞務朕以其久居內職累事先朝恩厚君臣貴令始終得就優閑之祿用申寬大之恩可太子賓客散官勲封如故王者施行

加程執恭檢校尚書右僕射制

門下職叅揆務權總戎麾必惟其人乃授斯柄自非
望崇垣翰功著旂常則何以副儀刑之求稱節制之
任我有休命爾其敬承銀青光祿大夫檢校兵部尚
書使持節滄州諸軍事兼滄州刺史御史大夫橫海
軍節度支度營田滄景等州管內觀察處置等使上
柱國邢國公食邑三千戶程執恭義勇立身忠慤成
性聚為事業發為勲猷歷事三朝久專外閭擬邦而
山岳北鎮奉國而金石為心動循武經居有循化洎
執珪入覲班瑞言旋忠懇內激於心誠恭順外務於

詞氣爰舉疇庸之典稍增命秩之榮方圖前勞且有
後命朕思安封域望在勲賢任既切於腹心位猶輕
於喉舌以守土勤王之効雖進官封念未朝述職之
忠未加寵數特升右揆俾壯中權勉終永圖無替成
績可檢校右僕射餘並如故

除王佖檢校戶部尚書充靈鹽節度使制

門下靜遠之要選將為先夫有統馭之才然按以節
制之任有撫備之畧然鎮以夏夷之衝期乎懷遏寇
虞慎固封域今予命爾時謂得人開府儀同三司檢

校刑部尚書兼右衛上將軍寧塞郡王食實封二百五十戶王必忠厚立誠果斷効用慎始終而行有枝葉踐夷險而道無磷緇早練武經累從軍職頃逢多壘實佐元戎節著臨危功叅定難位由勞致名以忠聞自列六卿且司七萃星霜屢變金石彌堅宜申命於北轅俾遏戎於南牧進地官以崇新命極勲秩以褒舊功中簡朕心外諧僉議况五原重鎮諸夏長城修戎政莫先於威聲牧邊民莫上於實惠師離昆夷之悍訊必在和地為獯虜之鄰撫宜以信勉率是道往分朕憂歲時之間期於報政委望斯在尔其聽之可檢校戶部尚書兼靈州大都督府長史御史大夫充朔方靈鹽定遠城節度副大使知節度事管内支度營田觀察處置押蕃落等使仍賜上柱國散官封實實邑並如故王者施行

除關巨源充邠寧節度使制

門下華夷要地實為蕃漢鈇鉞重柄必授忠賢况乎倚角諸軍金湯中夏有坐甲獲邊之旅任切於拊循有引弓犯塞之虞寄深於備禦內作心腹外張爪牙

苟非信臣不在茲選奉天定難功臣開府儀同三司
檢校尚書右僕射兼羽林軍統軍御史大夫上柱國
定襄郡王食邑一千三百戶關巨源備知虜態明練
兵符永惟頗牧之能宜授郟鄏之寄長南宮而遷左
揆壯西郊而委中權既圖前勞且佇來効於戲十聯
之節可以觀政萬夫之長可以樹勲勉弘令猷副我
休命可檢校尚書左僕射使持節郟州諸軍事兼郟
州刺史御史大夫充郟寧慶等州節度管內支度營
田觀察處置等使功臣散官勲封並如故王者施行

授吳少陽淮西節度留後制

門下議事以制擇善而行是適變通庶臻康濟此王
者所以弘德而息人也况閭外重寄淮右成師建有
德以統藩方擢育才以領留府抑惟令典今舉行之
彰義軍馬先鋒兵馬使正議大夫檢校右散騎常侍
使持節申州諸軍事申州刺史兼御史大夫會稽郡
王吳少陽忠勞國貴介承家蓄武畧於多叢宣吏
能於符竹屬元戎既歿謀帥其難朕將選衆以升試
可而用推掌戎務已逾歲時而能和輯師人勤脩土

貢布寬簡有恒之政動悅人情守恭順不踰之心靜
俟君命有嘉大節可假中權宜進列於貂蟬俾增威
於貔武仍加勳秩式茂寵章嗚呼重觀其能我拔委
之留事載佇其効尔宜勉於後圖敬思是言徃率乃
職可銀青光祿大夫檢校左散騎常侍依前兼御史
大夫使持節蔡州諸軍事權知蔡州刺史克彰義軍
節度管内支度營田蔡等州觀察處置等使留後仍
賜上柱國封如故王者施行

除程執恭檢校右僕射制

門下臣之節極乎忠功君之柄先乎爵賞欲忠者之
克懋也故爵有加等欲功者之速勸也故賞不踰時
古先哲王實用茲道令我命尔因其舊章橫海軍節
度支度營田治景等州觀察處置等使起復冠軍大
將軍左金吾衛大將軍員外置同正員檢校兵部尚
書使持節澹州諸軍事兼澹州刺史御史大夫上柱
國邢國公程執恭業傳將畧名在勳籍蘊天爵以備
已忠孝兩全竭臣節而事君夷險一致紀綱我列郡
節制我成師勳揚休聲靜著茂實自合符微旅奔命

出疆暴露歷於三時供億出於二郡整衆而身作師
律伐謀而心為戰鋒服金革而無辭當矢石而有勇
雨晦識鷄鳴之信風高見準擊之威遠畧既申茂勲
方集朕以恒陽之衆蠢爾無知毆彼生人致之死地
每一念至惻然以之與其傷和而濟功曷若含垢而
備德既罷師旅爰圖勤勞効且居多賞宜後重俾自
夏官之長特升右揆之崇獎忠勸功於是乎在承我
休命尔其欽哉可檢校尚書右僕射餘並如故主者
施行

除郎官分牧諸州制

漢宣帝云與我共理者其惟良二千石乎誠哉是言
朕每三復安得循吏副吾此心今之臺郎一時妙選
嘗經任歷率有才用雖典曹尤事其務非輕而卹隱
分憂兩寄尤重是用並命分牧吾人歲時之間期於
報政戶部郎中某可某州刺史兵部員外郎某可某
州刺史云朕高懸爵賞佇期庸効咨爾夙夜其敬
之哉無俾龔黃專美前代

除張弘靖門下侍郎平章事制

夫佐祐天子燮理陰陽平章法度登進賢哲外撫夷狄內安元元使百官咸脩其職一物不失其所此宰相之任也朕思得良弼馴致此道咨予命汝其殆庶乎某官張弘靖惟乃祖乃父代居相位咸有成績書于旂常爾有忠正恭肅文以禮樂曰濟其美振揚家聲一時之人謂之才子亟登清貫益著令問洎出刺陝郿移鎮蒲坂政不苛細甚得人心察吏將卒皆樂為用清簡之化聞于京師由是鄭風緇衣之好漢廷玄成之美朝望時議翕然與之人謀既同朕志在定

乃用登爾于左輔授爾以大政尚克欽乃嘉命業乃代官竭其股肱服我前訓嗚呼三代為相邦家之光爾其念哉無替乃前人之徽烈

授范希朝京西都統制

閭闔風至太白星高謀帥護邊國之大計某官范希朝忠貞勤儉以為質惠和智勇以為用一代名將三朝信臣朕以西邊列鎮三四若有總統則易成功思得良帥有威名者并護諸將歲一巡邊乘秋順令揚其威武則南牧之馬引弓之人知我有備不戰而去

誰可任者無如希朝以尔有朔方之勞有振武之功
功在疆場名聞羗戎惟實與聲皆副是選今拜尔為
大將尊尔為司徒節制進退一令諸稟倚望如右可
不慎歟可充京西都統

贈言南先父官并與一子官制

勅某官李吉棠出入將相迨今七載而能脩庶職叙
彝倫毗予一人以底于道夙夜不怠厥功茂焉夫忠
於君者教本於親寵其身者賞延于嗣於是乎有飭
終之命有任子之恩所以感人心而勸臣節也唯茲

舊典可舉而行

除李絳平章事制

昔在堯舜聰明文思尚賴良臣實相以濟况朕薄德
不逮先王是用急疾於求賢置之於左右俾承弼納
誨以匡不逮言雖逆耳必求諸道事苟利人咸可其
奏茲足以宣股肱之力成天下之務歷選多士爰得
良輔乃降厥命其聽之哉某官李絳齊莊嚴重內明
外直進退舉措有大臣體自叅內職每備顧問忠謹
之操終然不渝及貳地官專領財賦未逾周月亦有

白雲天...卷之五
成績歷試多可人望攸歸俾登中樞無易絳者於戲
爾有以文學入仕以正直奉上才膺大用職忒屢遷
十年之間位至丞相可以報國在乎匪躬欽哉懋哉
無忝朕命

授韓弘許國公實封制

梁宋之交水陸合會人難難理軍暴難戢因變肆亂
徃徃有焉唯此一方朕常憂慮今有良帥鎮而撫之
政立功成宜舉賞典某官韓弘以長材大畧作我藩
臣本於忠力輔以政理自今閩寄在潑之郊嚴整師

律恭守朝憲訓兵積業明罰信賞軍和食足禮節並
行河南晏如于茲一紀是則有大勳於國有大惠於
人會課議功無出其右夫有過人之効則有加等之
命古之王者所以賞一人而天下勸者用此道也可
不務乎是用建于上公授之真食以示殊寵以旌殊
績欽哉休命子孫其保之

除裴度中書舍人制

司勳郎中知制誥裴度以茂學懿文潤色訓誥體要
典麗甚得其宜施之四方朕命惟允况中立不倚道

遼氣平介然風規有光近侍臺郎滿歲班列當遷中書之秩所宜真授

除蕭俛起居舍人制

左補闕翰林學士蕭俛頃居諫列職固其優夙夜孜孜拾遺左右朕嘉乃志選在內庭自叅密近益見忠謹始終不替尤足多之記事之官一時清選俾膺是命以弘勸獎

除崔羣中書舍人制

庫部郎中知制誥翰林學士崔羣端厚和敏飭以文

學溫溫忠敬得大臣之風自列內朝兼司誥命事煩而益密職久而彌精六年于茲勤志至矣况大小之事常所訪問盡規極慮弘益居多所宜寵以正名式光禁職敬乃嘉命其惟有終

獨祕郁守本官知制誥制

考功員外郎史館脩撰獨祕郁為人沈實敏行寡言繁然文藻秀出於衆累升諫官再秉史筆洎掌功論率以直聞求之周行不可多得而掖垣近職綸閣重選俯詢時議爾宜居之

授沈傳師左拾遺史館脩撰制

京兆府鄠縣尉沈傳師庶職之重者其史氏歟歷代以來甚難其選非雄文博學輔之以通識者則無以稱命今茲命爾其有旨哉昔談之書遷能脩之彪之史固能終之惟爾先父常譔建中實錄文質詳畧頗得其中爾宜繼前志率前脩無忝尔父之官之職可左拾遺史館脩撰

除許孟容河南尹兼常侍制

昔吳公袁安為河南尹守皆能以廉平清肅馭吏教

人孰能繼之我有良吏某官許孟容才志甚大言論甚高在臺閣間藹然公望嘗尹京邑觀其器用臨事能守當官敢言不吐剛而茹柔不附上以急下政無煩碎甚合衆心及是轉遷頗有遺愛河洛千里都畿在焉凡所選任必歸望實考言詢事非爾而誰不忘舊政可立新績仍以騎省中而寵之

除李程郎中制

隋州刺史李程頃以詞學入叅詔命旋以才用出領詔條漢東大郡委之共理勵精為政三年有成中外

序遷朝之彝典尚書即缺尔宜補之

裴克諒權知華陰縣令制

華陰令卒非遷補時朝租勉農政不可缺前鎮國軍判官試大理評事裴克諒以佐本府頗有勤績屬邑利病尔必周知宜假銅墨試其才理待有所立方議正名

贈高郢官制

故尚書右僕射高郢立身從事皆有本末在亂不汚可以言忠守官不撓可以言直以道佐主可以言正

因年致仕可以言禮有一於此人鮮克舉况備四者不尔君子乎天不憖遺深用軫悼宜加褒贈以旌其風仍俾善人聞而知勸可贈某官

貶于尹躬洋州刺史制

中書舍人于尹躬其弟臯謨賊汚狼籍雖無從坐之法合當失教之責然以典職詔命恭勤五年我即念勞尔宜思過俾居近郡茲謂得中

贈裴洎官制

故太子賓客裴洎忠正恭慎佐予為理事君盡禮狗

國亡身積憂與勞邁成疾恙以至淪逝念之惻然頃
偏多故未申禮典永為褒飭寧忘于心今則命數之
間宜從加等庶使忠於君者有以勸焉可贈某官

除軍校邠寧節度使制

金方之氣凝為將星王者法天選命豪傑授之鈇鉞
拜為將軍以威西戎以護中夏而倚望若是安可非
其人哉某官某出忠入孝仗信抱義行有餘力勤學
讀書鬱然將材用兼文武自領軍衛為我臥牙夙夜
警巡不懈于位材官知訓環列增勲服勤五年茲為

成績可以移用使之守疆邠邠大藩控扼胡虜若得
良將則無外虞知臣者君非尔不可仍加副相以重
是行勉樹勤勞式光寵擢

除韋貫之平章事制

周宣漢宣繼體之主一得申甫一得魏丙咸克致理
號為中興朕嗣位以來永鑒前烈惟是賢俊寤寐求
思歷選周行乃獲時彥宜以政柄舉而授之某官韋
貫之溫重明正國之公器當官必守臨事能斷簡在
朕志迨今累年乃者擢居諫司以觀其直出領符竹

以觀其理煩之劇務以觀其用訪之大政以觀其體
歷試必中衆望允屬倚之為相僉曰宜哉可中書侍
郎同中書門下平章事夫臣事君以忠后從諫則聖
靡不有初鮮克有終理化不成恒由於此今我與尔
永終是圖雖休勿休以臻其極嗚呼二宣之業吾有
望焉

除范傳正宣歙監察使制

古之諸侯三載考績選其賢者命為長率所以勸功
行而興理化也蘇州刺史范傳正文學政事二美具

焉選自郎署出分符竹江南列郡連領者三所至之
部悉心為理明諭朝旨恭守詔條謹身省事以臨其
下政簡而肅意誠而明吏不能欺人是以息而去思
之嘆來暮之謠往復有政聞於人聽雖古循吏幾以
加之朕以陵陽輿壤土廣人庶其地有險所寄匪輕
跡其前効可當此選况黜歎之遺愛尚在吳興之新
政方播升車便道足憫人心固當望風自安計日而
理倚注於尔徃宜欽哉

白樂天文集卷之五

白樂天文集卷之五

